

# Il grond giavisch – ina vatga per seser patgific

Decorar il pignol è ina fitg impurtanta lavur ch'ins fa cun bab e mamma

■ (anr/vi) Mattias Manetsch stat a Trun. El va en l'emprima classa. Era tar el a chasa spe-tgan oz tuts vess sin il bambin. Mattias e ses dus fragliuns han studegià bain ils catalogs da termagls. Pertge els han gi da far glistas per il bambin. Sin la glista da Mattias èsi nudà sisum ina vatga. Ina vatga da plastic? U ina vatga da lenn? «Naaa! Ina da seser!» declera Mattias. Ils auters giavischs sin il cedel èn: in crie da naiv, l'action-man, ina viafier da model. Il frar da Mattias ha era nudà la viafier da model sin ses cedel ed anc ina cd-rom. La sora pitschna dentant na s'interesse-scha betg per rodaglias e locomotivas. Ses fervent giavisch è ina stizun cun cassa.

## Ins sto laschar avert la fanestra

E tgenin è lura il pli grond giavisch da Mattias? Quel ch'el fiss propi in zic trumpà, sch'il bambin na purtass betg el? Gliez è clera chaussa: «La vatga.» Quella



Mattias da Trun decorescha il pignol ensem cun ses fragliuns.




FOTO G. VENZIN

saja in zic sco in pulstrà. «Sin quella pos jau seser, far termagls, mirar cudeschs u durmir.»

Ma avant che Mattias e ses

fragliuns dastgan pachetar ora ils pacs questa saira, capitan anc ina massa autras chaussas. «L'emprim tschanain nus. I dat fondue chi-

noise. Sco dessert datti forsà glatsch u petta.» En stiva laschain nus avert la fanestra. Suenter tschaina stuain nus spetgar fin

che nus uдин il bransin. Lura avra il bab l'isch-stiva e cuchegia, sch'igl è bun. La mamma va per in cudesch e raquinta ina istorgia

da Nadal. Igl è mintg'onn in'au-tra. Ina cun maletgs. Lura schain nus si versets e chantain. La mamma suna clavazin u flauta. En scola hai jau emprendi la chanzun 'Tgi cuora e cloma la notg tra'l marcau'. Suenter tadlain nus musica ed avrin ils pachets. Il bab e la mamma gidan nus da bajegiar si ils termagls. La notg va la mamma a messa. Nus gian pir l'auter di.»

## Ina pesanca stalla

E la stalla? «Nus vain ina stalla che Leo Demont ha fatg extra per nus. Da scorsa. Ina pesanca stalla. Ella ha si mistgel ed endadens è il bambin, la Maria, sogn Giusep, l'asen ed il bov. Nus vain era pasturs, tschuttas e nursas.»

Vegn il bambin cun il pignol? «Na, lez vain nus sez cumprà. Il bab fa en il pe e nus decorain el. Nus mettain si ruclas cotschnas, utschals, il spitg, maschas, chavels d'angel, tschigulatta, in um da naiv, ina locomotiva, in'auto e chaussas da pasta da sal. Il pignol è uuu grond.»